

La Svizra ed il Portugal

Ina lingua internaziunala

DA GUIU SOBIELA-CAANITZ

■ **Il december 2015 vivevan 268067 Portugais en Svizra – la terza cuminanza estra, suenter il Talians ed ils Tudestgs. Tge savain nus da lur pajais e da lur cultura?** Il Portugal occupa la sisavla part da la Peninsula iberica ed è separà da la Spagna cun in cunfin da 1214 km. Il punct culminant dal Portugal continental (89000 km²) cuntanscha 1991 m. en la Serra dad Estrela, da manaivel da lez cunfin. Il pajais cumpiglia plinavant dus archipels amez l'Atlantic, quel da Madeira (801 km²) e las «Ilhas dos Açores» («Insulas dals Sprers», 2322 km²) cun in culm da 2350 m. Il reginam da Portugal devi dapi il 12avel tschientaner, ma elè sa deliberà da la dominaziun castigliana (spagnola) pir 1640 cun la revolta da duca Gion da Bragança (1604–1656), proclamà retg Gion IV «o Restaurador». Il Portugal, sco

dal rest la Svezia, ha fatg part davosnà dal Congress da Vienna 1815. Dapi 1910 è'l ina republica. Il pajais dumbra passa 10 milliuns olmas. La regenza da primminister António Costa (Partida socialista) «ha confermà sia politica d'accoglientscha e d'integraziun areguard requirents d'asil» (1). A Miranda do Douro sper il cunfin spagnol dov'ins ina «lingua regionala» uffizialmain renconuschida.

Il politolog Yves Lacoste scriveva 1993: «Il portugais è ina da las linguas europeicas las pli derasadas en il mund – var 200 milliuns umans en la Brasilia, en ils pajais africans da lingua uffiziala portugaisa e, en Asia, Macau [en China], Goa [en India] e Timor» (2). El è uffizial en otg anteriuras colonias portugaisas ed en la Guinea equatoriala, anteriura colonia spagnola:

– Cun la Brasilia (passa 200 milliuns olmas) è il portugais in linguatg d'impuritanza mundiala. «Il gaud tropical da las

Amazonas ha ina surfatscha da 6,7 milliuns km² (...). La part principala è situada en la Brasilia (...). Da la sanadad dal gaud dependa quella dal clima mundial. Il gaud tropical magasinescha 90–140 milliardas tons da CO₂. Sch'ins al destruescha vinavant producesch'ins enormas quantitats da CO₂ en l'atmosfera» (wwf.ch).

– Il Moçambique (strusch 29 milliuns olmas) cun 2470 km da la costa africana vers l'Ocean Indic.

– L'Angola (strusch 26 milliuns olmas) cun 1640 km da la costa africana vers l'Atlantic.

– En il Golf da Guinea, part da l'Atlantic african, èn situadas la republica da São Tomé e Príncipe (strusch dus milliuns olmas, cun 209 km costas) e la Guinea equatoriala (passa in milliun olmas, cun 296 km costas).

– La Guiné-Bissau (strusch dus milliuns olmas) posseda 350 km da costa africana vers l'Atlantic.

– Il Timor Leste (passa in milliun olmas) posseda 620 km da la costa da l'insla da Timor vers il Pacific e l'Ocean Indic.

– Il Cap Verd (passa 500 000 olmas) cun 965 km da costas da sias inslas en l'Atlantic african.



Lissabon è la chapitala pulsanta dal Portugal.

MAD

1. Istituto geografico De Agostini (ed.), Libreria geografica, *Calendario Atlante De Agostini. Novara (Piemunt) 2018, p. 902, chavazzin «Portogallo», p. 1237.*

2. Yves Lacoste (ed.), *Dictionnaire de géopolitique. Paris (Flammarion) 1993, ISBN 2-0803101-X, p. 1237, chavazzin «Portugal».*